

袁中郎全集

詩集

袁中郎詩集

擬古樂府

附雜體

樂府之不相襲也。自魏晉已然。今之作者。無異拾唾。使李杜元白見之。不知何等呵笑也。舟中無事。漫擬數篇。詞雖不工。庶不失作者之意。具眼者辨之。

飲馬長城窟行

長城水鳴咽。夜夜作秦語。問子何代人。防胡舊軍旅。冤魄滯孤魂。不得歸鄉土。白水洗白骨。癢盡水酸楚。洗多成黑流。水性毒於蠱。立馬古戰場。長嘶待天雨。

長安有狹斜行

按金駒。立長溝。枇杷落盡茱萸秋。山西女兒帕勒頭。面上堆粉疊堆油。二十五絃彈箜篌。猩紅衫子葡萄綃。笑問南裝如此不。

結客少年場行

結交徧四海。鄉人無半識。恥納無意儒。寧結有心賊。白手一布衣。喜怒關通塞。將相每在門。望氣如望職。易卜天昏晴。難候君顏色。頭顱可擲人。一顧不可得。

釣竿行

嚴灘一絲名。渭水一竿勢。所釣非所求。巨鱗安得至。不如無名子。心胸少根蒂。朝隨鷗保歌。夜引魚蠻醉。探水

如探甕。隨手得鱸鱖。鮮蔬煮活魚。無鹽亦有味。

秋胡行

堂上姑待汝。袖中雖有金。不堪贈彼姝。妾懷如日。君情若泥。路旁之心不自保。安保他國無蛾眉。沙浩浩。水咽咽。妾死情不死。節。河水如可竭。妾腸當再熱。

妾薄命

落花去故條。尚有根可依。婦人失夫心。含情欲告誰。燈光不到明。寵極心還變。只此雙蛾眉。供得幾迴盼。看多自成故。未必真衰老。辟彼數開花。不若初生草。織髮爲君衣。君看不如紙。割腹爲君餐。君嚙不如水。舊人百宛順。不若新人罵。死若可回君。待君以長夜。

有所思

人生如驛騎。往復無停勒。胸懷無盡絲。漫天作虛織。秋霜與春風。乘間遞爲賊。衰老迫紅顏。白髮傳消息。積雪填枯井。井深填不得。眉稜萬斤重。白日沉幽墨。欲行戒嶮難。欲飛防繪弋。

善哉行

今日相樂。式舞且歌。鵲絃鐵板。白面青蛾。食羔以七。盛酒以盆。刀鐮亦厭。何必河豚。儒迂墨儉。跖非堯是。善哉諸君。請入禪裏。讀書不成。學仙寡效。臙腹蠶枝。從吾所好。

猛虎行

甲蟲蠹太平。搜利及邱空。板卒附中官。鑽簾如蜂踴。撫按不敢問。州縣被訶斥。槌掠及平人。千里旱沙赤。兵衛與郵傳。供億不知幾。即使沙沙金。官支已倍蓰。鑽徒多劇盜。嗜利深無底。一不酬所欲。忿決如狼豕。三河及兩浙。在

在竭膏髓。焉知疥癬憂。不延爲瘡痂。

相逢行

行行卽曲巷。曲巷多蒿草。隱路掠蛛絲。讀書歲月老。壁上榮啓圖。手裏黃石編。當盡三時衣。不直數緡錢。兒女無揮著。常時煨故紙。稅地植桃花。十樹九樹死。君莫悲腐草。腐草發光耀。元霏長冬青。白髮傲年少。

悲哉行

石馬立荆棘。荒城叫老羆。昔時冠帶人。唯有鶴來歸。宿志慕長生。朋黨盡刺譏。父母不我容。碧海三山飛。朝牧老君龍。莫守劉安雞。仙家歲月長。桃子三垂枝。歸來見荒塚。半是孫曾碑。城池百易主。族里無從知。古人悲夜繡。今我亦似之。白骨不可語。鶴歸空爾爲。

門有車馬客行

門有車馬客。錦欄烏紗巾。寒毛接短鬢。絲絲沙與塵。問子何勞勞。上書西入秦。八年始一命。官卑不救貧。胃霜揖槐柳。望灰拜車輪。一身百糾縛。形如一束薪。手纏不自解。利刃寄他人。蔗與藥同餐。雖甘亦苦辛。

短歌行

酌君易州之清醞。被君吳閭之織綯。男兒二十無所成。腰肢一半沒青草。趁輕健。買驪鬚。哭聲多。笑聲少。黃金蕩盡君莫嘆。古來俄殺幾賢人。

京洛篇

煌煌京洛城。朱衣喧廣道。白首賤書生。驢鞍掛詩草。懷刺謁恩門。門卒相輕眇。十上十不達。登街顏色槁。疊身事貴公。習諛苦不早。罩眼一寸紗。茫茫遮人老。

鰕組行

鰕組出潢潦。道逢東海使。魚服而介身。呬浪以相戲。物微恐見侵。跳波爭努臂。東陂招能兄。西谿喚螺弟。水蟲萬餘種。各各條兵議。聚族鼓鱗鬣。不能當一噉。

升天行

乘赤霧。鞭鸞轍。路逢王子晉。玉簫已吹折。織女弄機絲。餘緯爛霄闕。下土囂風民。誤喚作雌霓。張翁老且耄。舉止多嫖褻。侍仙三萬年。不曾見隆準。真人多竄左。天狐慘餘孽。羲御失長鞭。牽牛嘆河竭。

櫓歌行

妾家白蘋洲。隨風作鄉土。弄篙如弄鍼。不曾拈一縷。四月魚苗風。隨君到巴東。十月洗河水。送君發揚子。揚子波勢惡。無風浪亦作。江深得魚難。鷓鴣充饅臠。生子若鳬雛。穿江復入湖。長時剪荷葉。與兒作衣襦。(魚苗風。洗河水。皆長年語。)

青驄馬

青驄馬。九尺強。百金買。千金裝。雙蹄不著地。影滅如飛翔。借問冶遊郎。何爲在他鄉。下馬立青梧。手提碧珊瑚。千喚不知人。盡眼眊當壚。當壚豈不治。褰衣愁曉露。五步一停驂。十步一回顧。客從遠道來。贈我青鸞帶。交頸復同心。白石青松在。東家好女秦羅敷。西家蕩兒馮子都。鴛鴦只愛毛翎好。那知水底有鸕鷀。

折楊柳

豔陽二三月。楊柳枝參差。每逢雙燕子。憶得別君時。憶得別君時。遺君珊瑚枕。君行佳麗地。何人薦君寢。越女性如綿。吳妓情似紙。夫君浪子心。吹作東西水。前月父書來。道君遊淮北。今月見君字。知作江南客。江水自清流。照

君不照妾。

紫驪馬

紫驪馬。行且嘶。願爲分背交頸之逸足。不願爲追風絕景之霜蹄。霜蹄滅沒邊城道。朔風一夜霜花老。縱使踏破天山雲。誰似華陰一寸草。紫驪馬。聽我歌。壯心耗不盡。奈爾四蹄何。

短歌燕中逢樂之律作

下馬一言。不及暄寒。昔年毛羽。今日肺肝。我懷如瘕。君懷幾許。登堂直視。無心可舉。明月浮空。清霜墮地。將軍北園。金吾西第。羅屏畫掩。金疊夜開。呼盧射覆。飛爵流杯。吾爲若舞。若爲吾歌。劍去龍沉。逝將奈何。情長刻短。爐寒火青。歛尊亂筯。誰是主人。鵬飛九萬。爲鷁鳩笑。我欲攜君。連翩海嶠。

橫塘渡

橫塘渡。臨水步。郎西來。妾東去。妾非倡家人。紅樓大姓婦。吹花誤唾郎。感郎千金顧。妾家住虹橋。朱門十字路。認取辛夷花。莫過楊梅樹。

醉鄉調笑引

無懷十六傳。乃至酒聖人。其道尙清淨。無爲而化成。周公作酒誥。流言幾褫身。宣王不得已。乃爲述酒經。經曰。天有酒。則不傾。國有酒。則不爭。有王者起。必世而後仁。何用導以德。齊以刑。但當引酒爲河。累醴爲城。日月所照。霜露所墜。凡有血氣者。莫不醉醒醒。死兮不知死。生兮不知生。沃殺知巧鬼。何愁不太平。

劍泉上

劍泉上。山如黛。劍泉下。水如佩。一片青。閩人代。鬼竊窺。山靈驪。生公法。今何在。真娘墓。遙相對。一日計千舟。一

舟計萬錢。寧負公家稅。莫負少年年。女可鬻。妻可徙。石上歌。應不止。

逋賦謠

索逋賦。逋賦索不得。不是縣家苦催徵。朝廷新例除本色。東封西款邊功多。江淮陸地生洪波。內庫馬價支垂盡。民固無力官奈何。蘇州舊逋七十萬。漕折金花居其半。安得普天盡雨金。上爲明君舒宵旰。嗟乎。民日難。官日苦。竹開花。蠟生土。

祝雨

雲縷縷。山絮絮。寒欲來。暖先據。洗山山骨新。洗花花色故。寄言行雨兒。莫下山頭去。

西陵橋

西陵橋。水長在。松葉細如鍼。不肯結羅帶。鶯如衫。燕如釵。油壁車。斫爲柴。青驄馬。自西來。昨日樹頭花。今朝陌上土。恨血與啼魂。一半逐風雨。

宋帝六陵

冬青樹。在何許。人不知。鬼當語。杜鵑花。那忍折。魂雖去。終啼血。神靈死。天地羶。傷心事。犬兒年。錢塘江。不可渡。汴京水。終南去。縱使埋到厓山厓。白骨也知無避處。

西施山 一名土城西施教歌舞處

西施山。一片土。不惜金作城。貯此如花女。越王跪進衣。夫人親蹋鼓。買死傾城心。教出迷天舞。一舞金闕崩。再舞蘇臺折。槌山作館娃。舞袖猶嫌窄。舞到夫差愁破時。越兵潛渡越來溪。

入青口

入青口。青口山何直。雲老玻璃天。鬼下空青壁。一路罡風吹地起。神禹無功巨靈死。

二

入青口。青口山何仄。石人立而啼。雲吼吼相逼。紺巖開老沉香花。飛仙失路虎無家。

三

入青口。青口山何翠。澗色碧琉璃。山花紅玳瑁。天荒地窖無行處。山頭魍魎紛來去。

玉京洞

深如谷。高如屋。穴雲心。穿地腹。路荒唐。齒嶮巖。石如病。天似癡。黃者漿。白者髓。雲絮絮。出轡底。白蝙蝠。大於雞。衝焰起。撲人飛。突而高。嶺間之。忽而平。谿限之。龍欲言。聞人止。涎沫流。腥風起。鬼耶仙。煙歟霧。炬無光。將安去。海可通。江可涉。靈威丈人難再得。

別石簀

十首不容分析故總入雜體

別石簀。石簀何忍別。相知是相知。知處難容舌。一等是肝腸。輸君生死切。烈火燎虛空。火盡空不滅。

其二

古今只四倫。大抵缺朋友。誰識楚越人。萬里爲奇偶。我腸寄君心。君心出我口。覓同本自無。異於何處有。

其三

一葉隨東風。飄泊已半載。梯雪度深山。寒氣鑠孤拐。三入淨寺門。寺僧笑狂駭。欲得不相識。除非觀自在。是仙是凡人。請君是揮解。

其四

君攜我如頭。我從君若尾。不是西看山。便是東涉水。誰家薄福緣。生此兩狂子。受用能幾何。苦他雙脚底。

其五

學道不學禪。談星不談義。愛曲不愛音。讀書不讀字。人天收不得。賢智亦爲祟。不知何因緣。偏得同臭味。每笑儒生禪。顛倒若狂醉。除却袁中郎。天下盡兒戲。

其六

南山有禽其字曰希有。北山有鳥其名曰鳳凰。兩鳥排雲扶霧入虛空。虛空莽莽四顧絕稻粱。下界豈無七寸之梗米。爭奈網羅纒纒常高張。

其七

不卽凡。不求聖。相依何。覓性命。三入湖。兩易令。無少長。知名姓。湖上花。作明證。別時衰。到時盛。後來期。不敢問。我好色。公多病。

其八

歸去尋阿賓。阿賓亦呼人。公家廿一弟。超脫是其倫。天不孤生物。有輓必有輪。狂態誠可取。其若頭上巾。

其九

氣噓爲風。雲流爲水。人之小人。天之君子。鳴不能飛。蚓不能躍。梟哭非愁。鸞歌非樂。無曰升天。天卑於淵。無曰。歐淵。淵高於天。卽佛卽聖。非儒非禪。

其十

能再相從否。若鴛相思車。當問白門柳。

酒正喧。蕭君席上作

酒正喧。關吏言。請君秣馬飭歸轅。巴川健兒豕成羣。邀官挾吏通州門。逐虎怯。逐飛蚊。倭刀吼。室箭出。韃。東坊西市榜明文。不嚴軍律嚴司閫。木門蒼琅根。日未昏。斷行人。

坐王官谷朋石館得石字

林家梅。米家石。苟家香。謝家屐。鶴瘦帶道容。松老入詩格。竹子一萬梢。十里屯秋碧。雜花四五種。聊作琅玕役。貯雪點梅湯。和香燒笋炙。一分供調御。一分待幽客。

洋溪湖嘲沈青平

家湖頭。客湖尾。深盎淺甕量魚子。大婦得白鱸。小婦得赤鯉。天乾富馬潯富鮓。驅兒牧豕荻根下。

二

湖頭船。湖尾屋。丈人把叉塔收目。朝鋪乾鼈裙。暮膾鮮鱸絲。螺頭蚌子送婦歸。

戲題道士湫

小孤詩真山翻作假山看

道士名。髡其顛。眞石壁。假貌山。陽戶開北面。東流水西還。采石娥眉小姑鬢。蒼瘦爭似老黃冠。江漢手覆三迴乾。古風遺尾青闌干。

代青溪道士見招

青溪月。和霜和冰發。萬仞沁寒潭。冷盡玻璃骨。青溪花。傍水帶煙斜。東曲謝蘭香。西曲萼綠華。青溪水。雲根洗清泚。朝浸角里芝。暮烹王烈髓。青溪雪。萬頂千峯徹。隔浦喚仙奴。夜春雲母宵。君之來。猿鳥笑。雲爲舟。風爲棹。鬼谷罷談。孝先徒驚。騷鳳與駕鶴。知非君所好。吾爲君招赤城之化骨。及絕逸之髯。君爲我歡。然而就道。君不來。雲山悞。

嘲王以明先生

王夫子。有書如郝隆。何緣阿堵堆青銅。君不見牀頭有心癩夷甫。道上無人追楚弓。

雀勞利歌

雀勞利。雨雪至。大雀悲。小雀慄。黃鵠舉千里。大鵬搏九萬。鷓鴣與杜宇。聲聲來相勸。字曰不如歸。鵲曰行不得。小大各有分。何用嘈嘈在我側。鸚鵡雖有舌。藏巧不如黠。

採蓮歌

採蓮花。花開何鮮新。映月爲處子。隨風作舞人。深紅淺白間秋水。妬殺麻姑與洛神。採蓮葉。蓮葉連香檝。一片青花古玉盤。持贈秦娥與燕妾。採蓮子。蓮房劈破香且美。纖手分來顆顆勻。何事經年沉湖水。湖水深猶可。水濁情無那。試問南溪二月泥。妾心辛苦知不知。

戲別唐客客豐城人

年年爲客向瀟湘。楚澤煙雲拾滿囊。綿花如雪歸故鄉。歸故鄉。應知青雀臨流日。內人嚬子墜衣裳。

其二

年年爲客向章臺。面脂如珠紅滿腮。短褐行纏歸去來。歸去來。稱得油麻如黍子。依舊風帆向楚開。

浩歌

雲作雨。不成歸。箭離弦。無還期。昨日犬。前日獅。一番花。一番泥。花有色。檻周之。人有容。鏡照之。鏡方新。容已非。檻未敝。花先飛。短可續。用何物。一曲歌。三杯醪。我欲長生天下人。拔刀斬斷金烏足。

諸衲送至江干自嘲

浦江渡。二十年中五番去。餐雲醉石幾經春。畢竟驅上長安路。浦江上。柳如雲。江若有知應移文。隔谿老衲笑且語。塞耳喧呼如不聞。

戲作三星行送曹子野歸楚時子亦將歸里

石公先生。汝生以鄭爲宅。以水爲度。眠龍癡蛟鞭其尾而不飛。唯有蟄龍聞雷而起。仰天滄滄如有訴。所樂者瘦壤清泉。所吟者溪風月露。有竅無心何所鬱。以鳴。不過感時觸機。如風行於空。而萬竅自怒。隱流縈客目爲山中之韶護。識者又以爲偏枯冷淡。似於陵仲子之清。軒轅彌明之句。石公撫几而笑曰。曹君。汝豈敦煌之索。平原之駱。長安冠帶。隘巷陌而相求。胡爲乎逐西風而遠去。君旣脂車。余亦戒路。望江上之青峯。指湘臯之紅樹。漢沔相阻。一衣帶水。俟君於油口之渡。左公城外綠刺天。便是巨擘高吟處。〔巨擘。蚓之大者。〕

過中山見諸名蹟題清風店壁

中山酒可飲。塔可登。輞川翠竹風稜稜。東坡瘦墨如健鷹。唐封古蹟石峻嶒。刺史愛民慈且能。高看青山夜抱冰。

石公解嘲詩 有序

客有嘲石公不能飲者。石公作詩解之。石公不知何許人。嘗吏吳。登石公山而樂之。因自命曰石公山人。醉國之君臣。未必皆飲徒。石公西來時。曾一造其廬。飲流相與言。不飲眞害馬。寧知醉國遙。不在杯與罍。辟如解琴人。非是用絃者。又如古董家。不必善陶冶。海闊酒池波。天限糟邱域。大有醜藥郎。欲往不可得。於是石公乃攘袂而起。撫手按節而爲之歌。歌曰。昔者汝陽王。道逢醜軍口。流涎醉鄉之日月。不加延。後來蘇子瞻。望酒盡而醉。醉鄉之日月。不加逝。又歌曰。信美此土兮。樂而忘死。彼國之人兮。愛賢好士。彼國之王所與遊者何人兮。華胥之君臣。

西方之父子。彼國無劫數等量兮。不知者以爲自酉而開。至卯而止。於是醉君聞石公名。乃召以爲客卿。

潼關題壁

官道上。塵昏昏。郵舍中。氣熅熅。夾道如火益膏薪。柏魚失水噉其脣。華山君。豈不聞。濡筆雨。和墨雲。十丈蓮焦。玉女嘖。乘風自振瀟湘裙。夜半澆我洗頭盆。

贈李醫者

秋橘綠成行。方書白滿架。君非韓伯休。胡乃不二價。去年衲褐辭鄉里。遊來半載聲名起。參苓如山信手空。門前冠帶若流水。長安醫士亂於麻。箇箇烏紗似老鴉。誰似豐城李公子。談笑直揖五侯家。朝賣藥。晚致身。大婦喜。小婦嘖。席未溫。呼先生。

哭臨漳令王子聲 附

窮冬夜冷蘭煙黑。死字傳來聽不得。白日誰防鬼射人。昏荒頗怪天如墨。憶昨與君發長安。白齒青眉吐肺肝。小杯擊筑大杯舞。優兒牙板角盤盤。別來愁絕湘鱗子。蠅花箋子無高翅。銅雀臺邊萬縷腸。館娃宮裏千行淚。麒麟蹶地青鸞叫。不得生書得死報。帝前金管豈無人。何必如花一年少。天公錯注不同頭。銀匣沉沉地下愁。漳水萬年嘶石馬。虎號龍愁兩廢邱。

其二

垂頭再哭哭聲啞。長夜幽幽悲逝者。破玉鍾珠可惜人。天何言哉無知也。三哭眼酸淚枯欲流不得流。焚香告天。願天爲我開嚙喉。鵲淵魯高士。胡爲三十二而死休。靈均楚直臣。云何枯槁江潭望。君門而媒寔修。秦何爲而投閑。賀何爲而賦樓。渴何爲而病馬。癩何爲而疾牛。龍何愚而觸網。鰲何細而隨鉤。山何卑而成水。海何升而爲邱。聖

者不能言。愚者不能憂。釋迦與老子。眯矇雙白頭。卽如王子聲。高第十二秋。窮年只淹蹇。低眉拜督郵。讒言復間之。刺心如戈矛。纏棺布三尺。棲身土一坯。嗟乎子聲。汝生不能一日牙。脾黑鬚拱手長安道。又不能拂衣故園補綴先人草。萬里迢遙魄伴魂。一具瘦骨官送老。福君何其薄。奪君何其早。和氏室有泣。楚國無以寶。天不平。地不平。吁嗟乎王子聲。

湘湖蓴菜 附

托根西湖。沉質湘水。鍊玉爲脂。熬冰出髓。松及蘇人。皆云無此。盛春而生。方夏而止。何故季鷹待秋風起。

五言古

出燕別大哥三弟

長安二月時。陽緩北風厲。霜刀割地皮。古木凜寒氣。紛紛騾馬塵。曉起如雲碎。置酒上南岡。別我好兄弟。一母生三人。頂踵皆相類。發願窮無生。百劫相砥礪。言前識鋒機。死裏尋關捩。居身如豎銅。蓄口唯談義。兄性溫而真。弟性溫而毅。余性兼寬猛。弦韋時相濟。墮地便同根。飛天亦共翅。一旦忽分首。能不添憔悴。白馬望吳門。慘淡無邊際。畏路如畏虎。猜官如猜謎。長兄見老成。勸余勉爲吏。錢穀慎出入。上下忌同異。小弟發狂譚。兄言胡乃贅。胸臆自可行。榮枯安足計。縱使挂彈章。亦只數行字。八十日彭澤。獨非男兒事。言罷日西沉。強起各分袂。馬尾對馬尾。東西倏異位。欲哭近婦人。一笑飛寒淚。

漸漸詩戲題壁上

明月漸漸高。青山漸漸卑。花枝漸漸紅。春色漸漸虧。祿食漸漸多。牙齒漸漸稀。姬妾漸漸廣。顏色漸漸衰。賤當壯盛日。歡非少年時。功德黑暗女。一步不相離。天地猶缺陷。人世總參差。何方尋至樂。稽首問仙師。

戲題齋壁

一作刀筆吏。通身埋故紙。鞭管慘容顏。薄領枯心髓。奔走疲馬牛。跪拜羞奴婢。複衣炎日中。赤面霜風裏。心若捕鼠貓。身似近蝗蟻。舉眼盡無權。垂頭私自鄙。南山一頃豆。可以沒餘齒。千鍾麴與糟。百城經若史。結廬篋筆峯。繫艇車臺水。至理本無非。從心卽爲是。豈不愛熱官。思之爛熟爾。

贈汪咸池乃郎

不是千時客。零丁向吳越。家貧訪故人。吞聲學干謁。先鬼能文章。清新好氣骨。遺篇猶入梓。桂枝已摧折。不忍念姓名。逢君滋哽咽。哀哉勿復言。長風捲愁雪。

別龔散木

梅雨濯江干。江風細吐寒。紅亭一杯酒。慘無賓主歡。天風吹子墮。倏忽送子還。遊踪如電影。閃爍太無端。子曰爲官苦。予嗟行路難。各自相慰勞。言言沁肺肝。與子如林鳥。升沉各羽翰。別子如湍水。東西異波瀾。何如一合併。白首臭春蘭。萍散有時聚。雲老終還山。江頭風雨歸。容易影朱顏。

陶石簣兄弟遠來見訪詩以別之

五步一花開。十步一花飛。不知誰家子。鬱鬱吐清姿。恬淡僧標格。瀟灑士威儀。手提白玉塵。身披淺色衣。徒步入閭門。揮羽上階墀。僮僕盡魁偉。一一皙而肥。或言是山人。或言星相師。或云鄉里子。聞聲始覺非。通刺無姓名。短紙摺不齊。一揖徑登牀。草草寒暄而。執手不問病。捧腹但言饑。設黍呼兒子。蒸魚命小妻。廣長舌有象。突兀語難羈。欲窮人外理。先剖世間疑。五行何因起。天地何高卑。鵠烏何白黑。日月何盈虧。生胡然而至。死胡然而歸。天胡然而喜。鬼胡然而悲。事無微不究。語無縛不奇。獨不及臧否。一切細碎詞。玄旨窮三日。清言暢四肢。愛君深入理。恐我倦傷脾。未作經年別。先爲五日辭。入宮尋西子。涉水弔鴟夷。七十二螺髻。三萬六玻璃。山水旣奇敞。相得永因依。有如重瞳郎。配合皇英妃。又如曹阿瞞。生逢大耳兒。石公貌高古。林屋洞傾欹。玉壺消夏灣。水齧千人磯。浪頭懸閭里。屋底腥蛟螭。山鬼攀蘿出。鮫人傍檻睇。卑者如鼃鼃。立者如象犀。幽者穿海底。高者躡雲梯。綠橘黃柑樹。青牛白馬祠。土人進新果。鄉女貢山雞。勝事紛難記。名山到始知。三朝盡縹緲。一雨負莫釐。歸來爲我言。山水見鬚眉。長公八九紀。叔子二十詩。字字傳實跡。語語發光輝。不獨作者難。讀者亦應稀。譚罷理前問。愁來申後期。還將赤金子。試我白

綿鐘拈花憐佛笑。摘葉止兒啼。蹶殺紫胡犬。踢倒西河獅。擊石原無竹。悟桃空有枝。一番銅鐵語。萬仞箭鋒機。病得發而減。客以樂忌疲。流連十許日。情短六箇時。丈夫一滴淚。錯落貴珠璣。今日若爲別。相顧浩漣漣。去去復去去。吳江落日低。

戲題黃道元瓶花齋

朝看一瓶花。暮看一瓶花。花枝雖淺淡。幸可托貧家。一枝兩枝正。三枝四枝斜。宜直不宜曲。鬪清不鬪奢。傍佛楊枝水。入碗醑奴茶。以此顏君齋。一倍添研華。

初度戲題

碌碌復碌碌。浮生如轉轂。帝宏匝地羅。人窘彌天獄。墮地三十載。強半是顰蹙。算喜無十星。量愁有千斛。十五歲以前。師傅苦拘束。朝愁日上春。暮愁書難讀。十五歲以後。龜手事場屋。儒巾才去頭。宦網又纏足。千眇得一官。萬眇得微祿。誰知微五斗。妻子轉枵腹。顏色低上官。肝腸枯案牘。舉止動得過。憎恚若相觸。月不十回圓。酒無三朝熟。來者不可知。去者不可贖。欲留色枯槁。欲歸心未一。一病覺昨非。萬仞遂黃鵠。勿以徑寸榮。易茲尋丈辱。

答江進之別詩

橫將一尺素。寫出消魂別。淚深筆波紅。情苦絹文裂。事君才兩載。相期礪高節。有過必直陳。無憂不共切。密意臭蘭旃。奇談飛金屑。案牘與文史。一一相商決。對客語如綿。當機鋒似鐵。喜怒哀情真。緩急肝腸熱。所以小修言。江郎吳令傑。官雖暫時離。交豈中道輟。古井絕迴波。深山無化雪。

別江郎

江郎貌奇崛。文字多古質。十三讀父書。十五夢先筆。父母憐愛之。保護常在膝。何不從我遊。扁舟訪二室。